

Situaziun extraordinaria era per las pleivs

Muort il coronavirus restrenschan las pleivs lur activitads tenor directivas era digl uestgiu

DA HANS HUONDER/FMR

■ **La situaziun cul coronavirus ha era consequenzas per las pleivs, respectivamein lur survetschs. Quels vegnan restrenschis. Per Aldo Tuor che presidescha la pleiv S. Gions a Mustér ein las mesiras pretendidas dalla confederaziun e dil cantun da risguardar.**

Nozzas e battens mo pli el ravugl da famiglias. Negin creisma entochen la fin d'avrel. Las fiastas communablas per

l'emprema s. comuniun han buca liug uonn, las pleivs san eventualmein organisar ellas pli tard el decuors digl onn. Medemamein duein survetschs divins haver liug su-

lettamein sch'il diember da presents en baselgia surpassa buca 50. Parochianas e parochians duein sereparter aschi bein sco pusseivel en baselgia. Il medem vala per sepulturas. Quellas ed autras mesiras pren igl uestgiu en connex culla situaziun cul coronavirus. Las pleivs ein vegnidadas informadas il venderdis vargau sin fundament d'ina circulara d'uestg Peter Bücher, administratur apostolic digl uestgiu da Cuera. Baselgias e capluttas duein denton restar aviartas per oraziun persunala.

Sco quei ch'igl uestgiu puntuescha duein pertuccai e lur famiglias vegnir assistis e susteni pastoralmeins.



Las baselgias duein restar aviartas per oraziun persunala, sco per exempel a Cavardiras. Il diember da survetschs divins vegn restrenschis considerablamein.

FOTO H. HUONDER

Survetsch restrenschiu

«Nus havein discussiunau la situaziun la sonda suentermezi di inna seduta dalla suprastanza ed essan vegni alla conclusiun ch'igl ei indispensabel da risguardar las directivas ufficialas», di Aldo Tuor. Sco

autras pleivs ha era quella da S. Gions a Mustér priu enconuschientscha dallas mesiras pridas dalla confederaziun e dil cantun, mo era digl uestgiu da Cuera. Aschia crodan a Mustér tuts survetschs divins e tutas devoziuns dalla sonda e la

dumengia a S. Gions, Segnas e Cavardiras, inclusiv da s. Giusep entochen dumengia da palmas. «Igl ei secapescha aschia che las messas vegnan visitadas era da glied sils onns ch'appartegn tenor la confederaziun alla gruppia exponida al

prighel dil virus. Nus lein secapescha far nies pusseivel per impedir ch'il virus sederasi», puntuescha Tuor. Sco a Mustér vegnan ils survetschs dallas pleivs era limitai en auters loghens.

Per che parochianas e parochians hagian tonaton la pusseivladad d'assistar ad in survetsch divin regulau vegn purschiu messas mingamai il mardis allas 17.00 e venderdis allas 09.30 en baselgia parochiala S. Gions sco era la mesjamna allas 17.00 ella baselgia a Segnas. En quei connex astgan buca dapli che mingamai 50 persunas esser presentas en baselgia. Quei corrispunda allas mesiras pretendidas da vart ufficiala. «Nus quintein che quels survetschs divins duront l'jamna vegnien buca visitai aschi stedi, aschia ch'ei vegn strusch a capitar che nus stuein tarmetter glied a casa», di Tuor. Las baselgias a S. Gions, Segnas e Cavardiras vegnan scaldadas mingamai la dumengia denter las 13.00 e las 17.00 per adraziun tgeua. Plinavon ha la pleiv decidiu che sepulturas seigien reservadas sulettamein pil ravugl da famiglia. La radunonza generala dalla pleiv vegn spustada sin pli tard. La fin da mars preveda la suprastanza dalla pleiv da salvar in'ulteriura seduta e da secussegljar co proceder da Pastgas. Pastgas croda numnadamein era el temps dallas mesiras pridas da confederaziun e cantun entochen la fin d'avrel 2020.

Las pleivs informeschan davart lur survetschs sin las paginas d'internet, tablas neris ni ella proxima ediziun dil Fegl ufficial dalla Surselva.

Grond success per la Voluntaria Trun

Promozion ella ligia naziunala B dil tir da gruppas cun buis silla distanza da 10 meters

DA HANS HUONDER/FMR

■ **La gruppia dalla Societad da tir Voluntaria Trun che separticipescha dapli biebein diesch onns al campiunadi da tir cun buis silla distanza da 10 meters ha contonschiu la promoziun ella ligia naziunala B. Igl ei il resultat da buna ed intensiva lavur duront biars onns.** Suentar esser separticipada plirs onns al campiunadi dalla 2. ligia ha la gruppia contonschiu avon in onn la promoziun ell'emprema ligia e gia ussa suonda in ulteriur pass ensiviars, numnadamein quel ella ligia naziunala B. Leu semesira la Voluntaria Trun igl atun ed unviern vegnent cun siat ulteriuras equipas ella gruppia ost dalla Federaziun da tir svizra. La gruppia ha contonschiu quei grond success cun resultats constants e fetg aults duront l'entira stagiun. Tuttas siat scuntradas encunter las autras gruppas ein vegnidadas gudignadas, aschia che la gruppia sursilvana ha schau nudar il resultat final maximal da 14 puncts. Il resultat total da tutas scuntradas munta a 10727 puncts. Quei ei ina media da 191,5 da 200 puncts pusseivels per tiradur(a). Sper Voluntaria Trun ha era Gais contonschiu la promoziun e quei cun in resultat total da 10713 puncts, pia entgens puncts pli pauc che Trun.

Giuvens ambiziunai

Il success dalla Societad da tir Voluntaria Trun ei remarcabels. Gronds merets en favur da quel ha il coach e trenader Baseli Tomaschett. El ei buca mo staus in dils iniziants dalla midada dalla casa da tir a Trun avon rodund 15 onns en in stan da sittar da 10 meters, mobein ei era staus prompts lu da sescolar e seperfectuinar sco trenader. Dapi l'entschatta eis el engaschaus sco trenader ella societad. Successivamein eis ei reussiu d'animar affons e giuvenils da sittar silla distanza da 10 meters ed aschia ei bein enqual talent ve-

gnius scuvretgs. «Il mument havein nus ina fetg ferma gruppia e leutier ina giuvna ch'ha aunc bien potenzial da svilup.» Denter auter cumprovan ils resultats al campiunadi svizzer da junioras e juniors la fermezia dallas tiraduras e dils tiradurs.

Per Tomaschett giogan entgens criteris in'impurtonza rolla el tir da prestaziun: «En emprema lingia ei quei il spert mental, mo lu segiramein era la tecnica e l'ambiziun.

Jeu constateschel adina puspei che l'ambiziun ei savens pli gronda tier las dunnas. Cu ei va sil carezial ein ellas pli consequentas.»

Ligia A ei negin tema

In ulteriur pass ensiviars ella pli aulta ligia ei per Tomaschett il mument negina finamira: «Nus havein grond plascher da quella promoziun e lein empruar da setener ella B. Sin fundament dils resultats mussai la stagiun vargada ei quei bein pusseivel. Per che nus savessen concurrenzar ella ligia A stuessen nus saver rinforzar la gruppia.» Negin'otra gruppia grischuna ei il mument en ina aschi aulta ligia dil tir da 10 meters cun buis sco Trun Voluntaria. Per ch'il success sappi vegnir garantius era egl avegnir fa la societad gronds sforzs ella promoziun d'aff-

fons e giuvenils. Igl unviern vargau han 12 trenau consequentamein ina ga per jamna el stan da tir a Trun. Els derivan da pli u meins l'entira Surselva. A bein enqualin atesta Tomaschett dabia talent: «En quella vegliadetgna ei il sustegn dils geniturs da grond'impurtonza.» Ils juniors e tiradurs d'elita treneschan duas ga per jamna, leutier vegnan era ils tirs ordeifer.

Da grond'impurtonza

Il tir cun buis d'aria sur la distanza da 10 meters gauda gronda simpatia tier las societads dil sport da tir en Svizra. El ei da

grond'impurtonza era per la promoziun dils affons e giuvenils. La concurrenza da gruppas dall'elita vegn purschida dapi la stagiun 1974/75. Il campiunadi cumpeggia differentas ligias naven dalla 3. entochen la ligia naziunala A. Ellas ligias bassas vegn sittaun en biaras gruppas. Enteifer las gruppas cun mingamai ogt teams sescuntra mingamai inna encunter l'otra. Quei succeda tenor in termin definiu. Sittaun vegn mingamai egl agen stan. Pil team ch'ha allura dapli puncts dat ei dus puncts e quels quantan la finala per la rangaziun finala. En minga team sietan ogt tiradur(a)s.



La gruppia dalla Societad da tir Voluntaria Trun che sieta da niev ella ligia naziunala B: Andri Tomaschett, Annina Tomaschett, Nadja Caviezel, Gianna Tomaschett, Chris Wolf, Elena Tomaschett, Leandro Petschen, Nicolas Tomaschett ed il coach e trenader Baseli Tomaschett (da sen.).

FOTO H. HUONDER